


Muab Hloov Ua Lwm Yam (Recycle)


Tej yam khoom uas yuav muab hloov ua lwm yam yuav muab sau ua ke thiab nqa mus rau ib lub tsev ua khoom es nyob ntawd lawv muab cov khoom no hloov ua lwm yam tshiab. Qee zaum lawv siv tej khoom no rov qab ua tej yam qub. Cov kos poom aluminum qub yuav muab hloov los ua cov kos poom tshiab. Muab 16 lub kos poom hloov ua lwm cov kos poom pab txuag tau li ib nkas loos roj rau tsheb.



Qee zaum tej yam khoom uas yuav muab hloov ua lwm yam yog siv ua tej yam txawv lawm. Tej hwj yas rau dej pev xij yuav muab hloov ua tej xov yas uas lawv siv ua ris tsho thiab kas pev.



Rau cov neeg feem coob txoj kev muab khoom hloov ua lwm yam yooj yim npaum li muab cov khoom ntawd tso rau ntawm ntug kev xwb. Yeej muaj ntau yam uas peb muab hloov ua lwm yam tau. Tej kos poom, tej lam hwj iav, tej ntawv xov xwm thiab tej thawv ntawv puav leej muab hloov tau ua lwm yam. Koj kuj muab tej hwj yas naj npawb #1 thiab naj npawb #2 thiab tej hwj nqia dab hloov ua lwm yam tau thiab. Tej hwj yas uas muaj lwm cov naj npawb, los sis tej hwj uas tsis nqia dab, peb muab hloov ua lwm yam tsis tau hauv peb qhov chaw tam sim no. Tus naj npawb no yog siv kom txheeb xyuas saib tej hwj no yog hom yas dab tsi. Xyuas saib lub hwj puas muaj tus naj npawb #1 los sis naj npawb #2 nyob rau hauv lub qab hwj thiab yog tias muaj no ces thiaj muab hloov ua lwm yam tau.



Yog tias koj nyob hauv ib lub tsev uas muaj neeg tuaj thauj cov khoom ntawm ntug kev, koj muab cov khoom uas koj xav muab hloov ua lwm yam tso hauv ib lub thooob, thiab muab lub thooob ntawd tso ntawm ntug kev thaum hnuv uas lawv yuav tuaj thauj cov khoom uas koj xav muab hloov ua lwm yam.




Yog tias koj nyob hauv ib lub kem tsev, tej thoob rau cov khoom uas yuav muab hloov ua lwm yam yuav nyob hauv qab daus (basement) los sis nyob nraum zoov ze cov thoob khib nyiab. Muab koj cov khoom uas xav muab hloov ua lwm yam tso rau hauv tej thoob rau cov khoom muab hloov ua lwm yam no. Yog tias koj tsis muaj tej thoob zoo li hais no, siv ib lub hnab los sis ib lub thawv ntawv khov kho los tau. Lub xeev Minnesota txoj kev cai lij choj hais tias txhua lub kem tsev yuav tsum muaj chaw rau cov neeg nyob haud tso lawv tej khoom uas lawv xav muab hloov ua lwm yam.



Yeej muaj ob peb yam khoom uas muab hloov ua lwm yam tau uas lawv tsis tuaj thauj ntawm ntug kev. Ib txhia khoom, xws li tej daim hlau uas tsis siv lawm koj yuav tsum thauj mus rau ib qho chaw uas muab tej daim hlau zoo li no hloov ua lwm yam uas nyob hauv koj koog zej zog.



Muaj ntau yam, xws li tej tshuab siv hauv tsev thiab tej TV, koj cia li muab pov tseg tsis tau li, ces koj yuav tsum thauj tej tshuab zoo li no mus rau ib qho chaw uas yuav saib xyuas tej no raws li qhov zoo.



Koj nrog koj lub nroog lub tsev hauv paus sib tham saib koj muaj cai tso tau dab tsi tseg rau ntawm ntug kev thiab saib koj yuav thauj tau tej khoom dab tsi mus rau qhov chaw yuav muab khoom hloov ua lwm yam. Koj kuj txuas tau rau www.GreenGuardian.com thiab kom koj thiaj li nrhiav tau tus naj npawb xov tooj uas koj hu tau rau tej ntaub ntawv xov xwm hais txog txoj kev muab khoom hloov ua lwm yam hauv koj cheeb tsam. Raws li GreenGuardian hais, txoj kev muab khoom hloov ua lwm yam ceev kom cov khib nyiab tsawg dua npaum li ib lab toos hauv lub nroog Twin Cities txhua xyoo.



Koj kuj yuav tau cov khoom uas yog siv tej khoom uas tau muab hloov ua lwm yam los ua thiab. Nrhiav kom tau lub cim rau ntawm daim ntawv lo rau qhov khoom, los sis nrhiav kom tau cov lus hais tias “made from recycled material” txhais tau tias siv tej khoom uas tau muab hloov ua lwm yam los ua los sis “contains recycled content” txhais tau tias muaj tej khoom uas muab hloov ua lwm yam nyob haud.

